

2015-imut Inatsisartut aningaasanut inatsisigigallagassaata allannguutissaatut siunnersuut (Aningaasaqarnermut Aatsitassarsiornermullu Naalakkersuisoq)

Saqqummiussissut

(Aningaasaqarnermut Aatsitassarsiornermullu Naalakkersuisoq)

1. Siullermeerneqarnera

Naalakkersuisut sinnerlugit 2015-imut Inatsisartut aningaasanut inatsisigigallagassaata allannguutissaatut siunnersuut matumuuna saqqummiuppara. 2015-imut aningaasanut inatsisissaagal-lartoq qinersinissamut nalunaaruteqartoqarnerata kingorna Inatsisartut immikkut ittumik ataatsimi-innerannut atatillugu aalajangiunneqarpoq.

Inatsimmik allannguinermi matumani siunertaavoq 2015-imut aningaasanut inatsisissap Inatsisartunit inaarutaasumik aalajangiiffigineqarnissaata tungaanut Naalakkersuisut akornguteqaratik Namminersorlutik Oqartussaanermik ingerlatsiinnarnissaannik kissaateqartoqarnera.

Inuussutissarsiornermut Naalakkersuisoqarfiup ungasianiit attaveqaqatigiittarnermut akitsuutip kr. 1 millionit angullugit qaffanneqarnissaanut inatsisitigut tunngavissinneqarnissani qinnutigaa. Tamatumama saniatigut nuna tamakkerlugu digitalikkut suliffissarsiortarfiup kr. 1,2 millionit angullugit aningaasartuuteqarfiusup suliarinerata ingerlateqqinneqarnissaanut qinnuteqartoqarpoq. Aamma Ilulissani Piareersarfiup illutaata allilerneqarnissaanut kr. 1 millioninik immikkut aningaasaliissuteqartoqarnissaa Naalakkersuisoqarfiup qinnuteqaatigaa.

Ilinniartitaanermut Naalakkersuisoqarfiup Nuummi illorsuarmik pisinissamut aningaasaliissuteqartoqarnissaa qinnutigaa, illorsuaq atuarfimmi sungiusartunut KTI-llu pikkorissaasarneranut atugassaasoq. Aningaasat qinnutigineqartut kr. 1,5 millioniupput. Tamatumama saniatigut Campus Kujalliup sananeqarnissaanut immikkut aningaasaliissutissat katillugit kr. 17,5 millionit Ilinniartitaanermut Naalakkersuisoqarfiup qinnutigai. Siullermik missingiutaagaluartumut sanilliullugu kr. 4 millioninik tamanna akisuneruvoq. Suliniut maannamut kr. 55 millioninik aningaasaliiffigineqareerpoq, aningaasanullu inatsisissaagallartumut allannguutissat aalajangiunneqarnerisigut katillugit kr. 72,5 millioninik aningaasaliiffigineqassalluni.

Inatsisartut Ombudsmandiata aalajangiinerata kinguneranik kina aningaasartuuteqassanersoq ersernerlummat aningaasartuutit ilaasa isumaginissaannut Peqqissutsimut Naalakkersuisoqarfik qinnuteqarpoq. Inatsimmi ersernerluttumik suliaq taanna 2015-ip ingerlanerani iluarsineqassasoq naatsorsuutigineqarpoq, aamma kingusinnerpaamik 2015-imi Inatsisartut ukiakkut katersuunnerannut atatillugu tamatumunnga aaqqiissutissamik siunnersuuteqartoqassasoq naatsorsuutigineqarpoq.

Tamatuma saniatigut Naalakkersuisut kommuninut ataatsimoortunik tapiissutinik atuutsitsilernissaannut, kommunillu KANUKOKA-lu suleqatigalugit ukiumut aningaasaqarfiusumut 2015-imut

kommuninut ataatsimoortumik tapiissutit tamarmiusut kommunit ataasiakkaat akornini agguanneqarnissaannut piginnaatitsissummik qinnuteqartoqarpoq.

Taamatut oqaaseqarlunga 2015-imut Inatsisartut aningaasanut inatsisigigallagassaata allannguutissaatut siunnersuut Inatsisartunut suliassanngortippara.